

عمارة ٢٧
منار شملول

عمارة ٢٧ / شعر
منار شملول
الطبعة الأولى، ٢٠١٠



دار اكتب للنشر والتوزيع
القاهرة ، اش المعهد الديني ، المرج
موبايل : ٠١١٠٦٢٢١٠٣
E – mail : dar_oktob@gawab.com

المدير العام :

يحيى هاشم

تصميم الغلاف :

حاتم عرفة

رقم الإيداع : ٢٠١٠/١٧٠١٢

I.S.B.N: ٩٧٨- ٩٧٧- ٤٨٨- ٠٤٦- ٢

جميع الحقوق محفوظة ©

عمارة ٢٧

منار شامل

شعر

الطبعة الأولى

٢٠١٠



دار الكتب للنشر والتوزيع

إهداء

بابا الحبيب .. القدوة

ماما الحبيبة .. الختونة

خالد .. هبة .. محمد .. إخواني الصغيرين ونور حياتي
منى زكريا .. صديقة العمر ورفيقة الدرب وحبيبة القلب
صديقات عمارة ٢٧ الغاليات .. نرمين ونهال ..

سناء وسارة

وكل الجيران بتوع زمان

الملحن الكبير " محمد علي سليمان "

الشاعر الكبير " فاروق جويده "

الشاعر المتألق " عبد الرحمن الأبنودي "

الشاعر الكبير الأستاذ " سيد حجاب "

الأديبة الجميلة " مها العباسي "

أستاذ " يحيى هاشم " .. دار اكتب للنشر والتوزيع

اللي بتمنى من الله انه يجازيهم كل الخير في مساعدتنا احنا
الشباب في تحقيق حلمنا

جميع أصدقائي اللي وقفوا جهمي

أهدي لكم جميعاً أولى دواويني الشعرية " عمارة ٢٧ "
ومن كل قلبي بتمنى انه يلاقني ولو مكان صغير في قلوبكم
الكبيرة

منار شملول

« جواب لمصر »

وسط الحارات جوة البيوت
كل اما بحلم حلمي ليه قوام يموت
نشع الرطوبة ع الجدار ورا كل دار دايب
هم الحياة في الوحوش تحت النعوش سايب
تعب السنين والشقيانين المحرومين
لا همهم مين راح يروح أو يبقى مين
كل العيون على لقمة تملى جوف جعان
لو حتى كان الفقر معشش ع البيان
عشان كده حلمي قوام ياناس يموت
ماشية أنا وسط الحوارى والبيوت

شايقة الطيابة جوه الغلاية على كل وش

محفوظ أفندي واقف بيع

بعد الوظيفة لحسن يضيع

قرب يا أفندي

جرب يا حضرت

بضاعة هائلة ولا فيها غش

وفضلت ماشية بين الحارات

أكشاك وكارو وفاترينات

شباب عواظلي معاه شهادات

ع القهوة قاعد م الألفينات

يقضي مصالح .. يتخذ .. وهات!

خلص يا مان ظبط سُجارة
كبر دماغك و انسى المِراة
ده العقل واخذ أجازة دايمه
دماغك عايمة! تضيع.. خسارة!
والتاني داير يلف بيها
على كل واحد صاحب إدارة
ويقول له إيه .. شغل يابيه
يرد عليه فين الأمانة !
يرجع غلبان مسكين تعبان
عقله يقول خليك مسطول
لاشهادة نفعت ولا دبلومات
صدقني يا ابني عَلَامنا مات

لا في شغل تفكر ولا تختار
تجيها يمين يقولوا فلحوس
تجيها شمال يقولوا حمرا
حق البنات جوا الحارات
حلم الحياة وفارسها فات
والقطر عدى ولا مرة هدى
و آديها قاعده من سكات
طب ليه يا بلدي يا اللي بحبك
طعم فرحي فيكي مات
حق العيال كانوا زمان
باللي يجروا ويلعبوا
ضحكة هنا نطه هنا

لا يَكُلُوا يوم ولا يتعبوا

دلوقتي صار كل الصغار

بلية الصبي

و إن يوم غلط أو يوم نسي

يجي صنايعي يضربو

لأه يا بلدي إصحي يا بلدي

وانفضي عنك تراب هم الظروف

وانسي يا بلدي كل اللي كان

ده كان سراب ملفوف بخوف

ده أنتي البلد اللي بنت حاجات كثير

ليه يا بلد الحر فيكي صار أسير

بعد أما كنت بغني ليكي زمان يا مصر

وأقول عليكى انك سبقتي كل عصر

بقيتي "ثالثة" و "الثالثة" ثابتة

حبستي نفسك ليه جوه قصر !

عشان كده حلمي ياناس قوام يموت

وسط الآهات جوه الخارات

والبيوت

« امشي يا قلبي »

إمشي يا قلبي وعيش الدنيا بدون إحساس

إوعى يا قلبي تصدق تاني كلام الناس

إرفع راسك اوعى تطاطي تكون منداس

ماحنا عرفنا خداعه وغدره مفيش إخلاص

ساعة يحبك ساعة يسيبك و أما خلاص

يشبع منك يرضي غروره قصاد الناس

يعد عنك ينسى جراحك يرمي الكاس

فاضي وقلبه ملوش في الحب ده أي أساس

إمشي يا قلبي وعيش الدنيا بدون إحساس

إوعى يا قلبي تصدق تاني كلام الناس

سيه يا قلبي يعدد عنك سيه بيع

بكره يعيشها خريف من قلبه بعد ربيع

ينسى غروره يظلم نوره وبكره يضيع

واللي سقاك المر يدوق من نفس الكاس

« وهم السلام »

طفل راقد فوق حطام

صوته ضائع في الآلام

بعد حضن أمه

الموت أصبح يضمه

راح معاه معنى السلام

لا محبة .. لا وئام

زرع بدمه في كل بيت

نبات عروقه الانتقام

ذنبه ايه الطفل البريء

يروح ضحية الانقسام !

يموت ابن الثلاث اعوام
بموته يحارب الالفزام
سلاحه دمه اللي اتسفك
وعرض اخته اللي امتلك
ودوري امشي في السكك
يا بلاد ضحية للكلام

كام اجتماع راح انقضى
والحلم سافر في القضا
وحديث ورغي في المنام
وكله بينادي السلام
والسلام هاجر بعيد

للشهيدة والشهيد

قال مفيش فايدة وسيبوني

اتقتلت وانتهيت واتسيت

ونفسي كنت اكون شهيد

صرختي تفل الحديد

مش وهم متزين وعود

وشوك محاط الحدود

صورة لحمامة الزيتون

واسم ضايح في العيون

نهايته من قبل البداية

اتحنق واتباع قوام

وبالسلامة يا سلام مدهون كلام

بعنا بإيدينا القضية

عجزنا فلسطين الصبية

بعنا بإيدينا السلام

ودوري إمشي في السكك

يا بلاد ضحية للكلام

« بحبك قد إيه »

قد الحقيقة و الخيال

قد اللي ممكن والمحال

قد السعادة و الآمال

وقد إيه

قد السحب قد الغيوم

قد الفرح قد الهموم

قد القمر ويا النجوم

عارف بحبك قد إيه

قد الرموش قد العيون

قد القلوب قد الظنون

قد الحنين قد الشجون

قلت إيه

قد عدد رمشات البشر

قد النجوم حوالين القمر

قد السحاب قد المطر

قد النغم جوه الوتر

قلت إيه

عارف بحبك قد إيه

قد الكون قد الجنون

قد الحركة قد السكون

وقد إيه

قد شعاع الشمس

قد احساس الهمس

قد براءة طفل

قد اليوم و الأمس

عرفت بحبك قد إيه

« كلام قلم »

قول يا قلم على كيفك قول

خلي كلامك مش معقول

جوه العتمة في وسط الضلمة

لا تخاف م الجن ولا م الغول

قول يا قلم غني المواويل

إفضح قسوة أي عويل

قول يا قلم ماتخاف م الأسر

قول قرآن انشد تراثيل

نور جوه قلوب الناس

ازرع جواهرهم احساس

اكتب اشجب اصرخ غني

اوعى تكون عبد وتنداس

قول يا قلم واكتب ذكرى

تاريخ ينور لنا بكرة

ازرع نبض في قلب حقيقة

تحمّل تولد لنا فكرة

قول يا قلم خليك في النور

إسع إوجع هلب ثور

اكشف ستر عصابة مالطة
ولو حطولك مليون سور
قول يا قلم مواويلك قول
خلي عقولنا تفوق م القول
غفي غناوي احكي حكاوي
قول أسرار أجدع مسئول
لو ينهينا فب صاروخ
مش هنكون ضعفا ولا مسوخ
لازم يا قلم منصحيهم
بكلام محتاج عين ونافوخ
لما تقابل عم عطية
قرب و أكتب له الأغنية

وعلمها له ويا عياله
ودي هتبقى له أحلى هدية
قوله يا عم عطية يا سايس
لا بتعليم ولا حتى مدارس
نفهم إيه معنى الحرية
أو نخلق جوانا فوارس
قول له تعبنا حداد وسكات
تعبنا كلام مليون حكايات
بيننا محمد الخير بإيدنا
نسمعهم أوجع صرخات
وقول يا قلم خليك جبار
بكلمة تطلع جيل ثوار

نادي الحق ونادي الخير

نفسى نحس أننا أحرار

« لا أنا هبكي »

لا أنا هابكي عليك ولا اقول ياريت تاني

ولا هاشكي لعنيك حيرتي وحرماي

و بكرة أنسى .. عذاب قلبي

سنين حيي .. وشوقي إليك

ولا هارجع .. ولا هاشكي

و ابوس صورتك .. وانا دي عليك

ماسبتش شيء .. أفكر فيه

ماسبتش .. إلا أحزاني

خلاص ابعده بقي انساني وعيش من غيري بالمره

ياخاين روحي وكياني حياتي معاك كانت مره

وم الآخر أنا كارهاك

رميتك .. برا وجداني

لا انا هابكي عليك ولا اقول ياريت ثاني

ولا هاشكي لعنيك حالي وحرماي

وبكرة أنسى .. عذاب قلبي

سنين حيي .. وشوقي إليك

ولا هارجع .. ولا هاشكي

و أبوس صورتك .. و أنادي عليك

ماسبتش شيء .. أفكر فيه

ماسبتش .. إلا أحزاني

« جنون »

الأبيض لون الحياة
والأسود لون الليل
ولما الأبيض ينطوي
ينطفي ويكون عليل
الشمس تفرق ف السكون
وتلم كراكيب الرحيل
يجري النهار بين السحاب
يدورّ ع اللون الجميل
لا يلاقي نجمة يعذّها
ولا حتى نسمة يضمها

ولا لون يتقال عنه الأصل

يبقى الجنون سرح .. برح

بمراكبه ف قلبي اللي انجرح

وصار عليل

يبجي الصحاب الأربعة

على دكة مائلة مربعة

مستئين التوجيهات

إمق الشتا بيعتر جنونه ع البيوت

ببرد ليله في الحياة ينسج خيوط

ويزرع في الطريق مطر

مفيهوش معاني للخطر

ماشي وحده ع الطريق

يلم قصاقيص الخريف
الشجون ويا الحفيف
دبلان وشايل فوق كتافه
راية بيضا فيها خوفه
بيدور عن يوم نظيف
و يجي بعده الأخ صيف
تحت الشجر قاعد حزين
عمال يقاوح في الأنين
بيفتكر ضحك العيال
فرحتهم لوحة ف الرمال
ع البحر لعب وهرجلة
زحمة بطريقة مبرجلة

لكن لون البحر اتسرق
وكان الشط صبح عجين
في فرن .. داب و اتحرق

فين الربيع .. ضاع الربيع !
كان فنان أصيل بديع
يرسم لوحة للحياة
مكنش عايزها يوم تضيع
ضاعت الألوان معاه
صبغ الجنون جوه الحياة

النبض جوايا ارتجف
الكون في قلبي إختلف
وصل لحدّي و اعترف
إني وصلت للخرف
والكاس شربته لمتناه
واتشوهت صورة الحياة

« جَلْبِي انْفَطِر »

* باللهجة الصعيدية .. إهداء للخال .. الشاعر الكبير عبد الرحمن الأبنودي

يُخَطِّفُوهم

يَجْتَلُوهم

بالمطاي

يدبِّحُوهم

الجلوب

و العيون

و الكلاوي

بيبيعُوهم

الأهالي بيوجعُوهم

بالمرار بيسكِّنُوهم

صرختي يا ضنايا يا ابني

رجرجت حجر المجابر

وانفطرت ومش هداري

جلبي مش جادر يعافر

آه يا ولدي

يا اللي بجيت صورة واحده زغيرة

آه يا كبدي

أنا انتهيت بعدك حياتي معفرة

انفرطت يا ابني

و انفطر جلبي عليك

لو بس يرجع لي الزمن و أبوس إيديك

يا ولدي إيه اللي حصل

جافل عنك !

ياللا أبنا نجري في العيطان و أجري عليك

يا ولدي آآآآه

ياللي ولاد الحرام خانوك

لا عرفت ربك يا الزُغَيْر

و لا اسم بُوك

طالبوا عمرك يا الحبيب

راحوا يبيعوك

كانوا جتْلوني أنا

ولا كانوا في يوم أبدا صابوك

الجلب الابيض

جطوره

الحضن الاخضر

فلجوه

اليوم وبكره يكرروه

وعيل جديد

يهدلوه

يخطفوهم

يجتلوهم

بالمطاي

يدبحوهم

الجلوب
والعيون
والكلوي
يسعهم

يخرت أبو اللي جابوهم
اجلدوهم .. عذبوهم .. ارحموهم
يحوا البراءة له
والعيال السمر
بئر العمر
يضيعهم

« عن الحياة »

ليه لما نآمن للوشوش

نلاقي فوقها ميت قناع

ليه لما نصدق الحياة

نلاقيها ماشية بالخداع

ليه مش عارفين نعيش

ليه كل شيء أصبح مفيش

ليه القلوب الطيبة القريية

ملهاش تعيش

ليه لما نبص ع الوشوش

نلاقي فوقها آلف آه

ليه لما نسأل ليه كده

يقولوا هي دي الحياة

ليه ما نسميش الماضي ماضي

ليه مانعديهاش و عادي

بكره يجي أو ميجيش

خلينا اليوم نعرف نعيش

« ع القهوة »

* إهداء لكل اللي على - راسهم بطحة - وعارفين نفسهم في زمن الدش والغش واللي - لا
سمح الله - ناهيها تحت ولوق ولا عندهم دجة النرق وده طبعها في بلد ثانية مش بلدنا !

**** وعندك واحد شاي خفيف سكر زيادة ****

= وياريت معاه واحد ظريف جوه الريادة

خليك خفيف لحسن نشرها سادة

= سييها على الله وقول لي .. تفكر رغيفنا بيشم عتبة
السيادة؟

تفكر الشغل في الزمن ده مش عبادة؟ .. تفكر صمتنا
وجهلنا جوانا عادة؟ والا دي أوامر السادة؟

ما اكيد يا مصري كله ماشي بالسداة

= نفسي أسأل عن حاجات كتير.. للغفير قبل الوزير

للفغير والكبير للحرامي والأسير

حق الحرية فين؟

الديموقراطية فين؟

الشعب صورة والا وهم والا أعمى ملهوش عنين؟

طب احنا فين والا مين .. وتر أنتيكا مكسور حزين

والا احنا حلفان اندفن واتنسى وضاع من سنين

لاعيبه ياخدوا بالملايين.. نقول جعانين

يقولوا مين!

و محتاجين

ده كان ع العين

لاخصخصة ولا مصمصه وكل قفه ليها ودين

شيلوا واحدة أو جرجروها واحنا وراكم يجي ستين

تفتكر نفضل ساكتين؟

والا نبيع من أبو ألفين؟

م الصكوك الملعونين

بلدنا دي والا احنا فين؟

يكونوش ملكوها واحنا عبيدهم الملاعين؟

والا ميراث ووقف قديم أراضى و طين؟

- ملوش لزوروم كل الكلام هناك محكوم

بيات ظالم وتبات مظلوم

وتبكي عينك م المهموم

يبقى الكلام ملوش لزوم

= يعني نمشي من غير هدوم؟

غرقانين جوه المهموم

لا صوت فكرة ولا حق بكره

فيه أمل تصفى الغيوم

والا نعيش في أنين مكتوم؟

ليه الكتابة.. يا عم روح

= طب سيفي أبوح

- هو الكلام يشفي الجروح

= أحسن ما أعيط والا أنوح

أحسن ما تقتلني الجروح

خليني أقول عن كل شيء

والا أرمي نفسي م السطوح !

طب قول يا سيدي

هتعمل ايه! والا أقول لك.. اعمل عييط..

= لاه زهقت ولازم أزيط

زهقت من دور العبيط

- يا عم مالك

مشي حالك ربي عيالك

في عيون كثير واقفة واعمالك

= يا سيدي متحطش في بالك .. هيعملوا إيه !

شغل ومفيش مش لاقى عيش ولازم تعيش

وعشان تعيش مجبور تعيش ويا الدراويش

حط دماغك جوه راسك

إعرف إيه أصلك وأساسك

اللي عليك للبلد إديه

وإن من حقك طالب بيه

خليك حر وعيش حرية

- ده احنا الثوم جوا الملوخية

= ومخاخنا صبحت ثقليّة

- طب ما انت كده فهمت الحال

= بس دوامه ده شيء محال

- يعني كلامك هيغيرها !

كان غيرك أشطر وعملها

= يعني أحط لجام على بقي

- لا بطل غنيوة حقي

= يبقى أموت م الجوع الكافر!

والا أحاول و الا أعافر

- مش هتطول حاجة وطاوعني

= و عمر كلامك ما يرجعني

هفضل أغني وأقول مواويل

هفضل أطالب بأخاصيل

يا غوت فيها وهما يعيشوا يانغرقهم جوا النيل*

* طبعاً نيل تاني هو مفيض غير نهر النيل والا إيه !

« مش حياة »

تبقى جهي لكن بعيد أبقى بيكي وأنت سعيد
و أبقى جهك تنكر وجودي وتقول عايش وحيد
دي مش حياة ولو هو ده شكل الحياة
يبقى لا و ألف لا

كنت بتهجر وأنا بستنى يمكن بكرة معاك أقف
ياما حلمت معاك بالجنة لكن حلمي ولا و تاه
ولو هو ده شكل الحياة
يبقى لا و ألف لا

حاولت كثير أَرْضِيكَ معرفتش

حاولت أنا دِيكَ كثير ماسمعتش

حاولت أغير فيكَ مقدرتش

وبقيت حد أنا مش عارفاه

ولو هو ده شكل الحياة

يقي لا و ألف لا

إبعد عني مش عايزاه .. قلبك ضاع جوايا هواه

لو هعيش في النار من بعده .. أرحم لي من الجنة معاه

بقيت غريب مش عارفه مالك .. معرفش ايه غير احوالك

ازاي أقبل هجرك قلبي .. بعد ماعشت سنين قواه

كنت بتهجر وأنا بستنى .. يمكن بكرة معاك أهنى

ياما حلمت معاك بالجنة .. لكن حلمي ولأ و تاه

دلوقتي خلاص مش فارقة معايا ترجعلي أو تنسى هوايا

من ظلمك أنا دقت كفاية وطريقنا وصلنا منتهاه

ولو هو ده شكل الحياة

يبقى لا و ألف لا

1
2
3
4
5

« كواليس »

يا كواليس الحياة فيكي العجب العجاب..

و ألف سر مرصود ورا كل باب..

ان حاولت اكون انسان طبيعي.. ما اعجبكيش..

وان اتلويت و عليت.. تقوليلي ايش جاب جاب..

طب اعمل ايه دليني.. قوليلي ع الأسباب!!..

في ناس أونطة تاكل محمر.. مشمر.. متزفرة بكباب..

وناس بتتعب وتشقى.. غلبانة عشاها تراب..

يا كواليس الحياة.. لو تقوليلي بس فين الباب..

لا يكون مخي ظلام ولا منتهي سرداب..

وهعمل ايه دليني.. ده شبابي راح وشاب..!!

« تَقْلَان عَلِينَا »

ليه بقى تَقْلَان عَلِينَا

والا مش عايز نجينا

مش خلاص احنا اتصالحنا

مش خلاص احنا اتصافينا

قلقي خاين قلت وماله

قلقي إني ولا على باله

حبيبي ليه ماتصدقيني

إنتي قلبي و كل ماله

ليه بقى تَقْلَان عَلِينَا

رغم ظنك اللي دايماً مش مكانه
والا شكك والا عقلك في جنبه
رغم انك ظلمتي قلبي وبتجرحيه
مفيش قلوب تسوي قلبك زي جنبه
حبيبي يالا تعالي يالا ماترعلش
مدي إيدك ويا إيدي وماتخافيش
بلاش تغيبي و تبعدي عني كده
بدون هواكي والله ما أقدر أعيش

« عمارة ٢٧ »

صوتي الحزين

ينادي ذكرى عدت عليها كثير سنين

صوت البراءة

ضحك وصدقة عسكر حرامي

وده من سنين

تنطيط ولعب قريج وجد

عايشين نحب عايشين لبعض

وده من سنين

جوا عمارتنا

سبعة وعشرين

كنا جيران .. أطفال جنان

طائرين بضحكة .. مالية المكان

عاشين سوا .. حب وحنان

لا هائمنا بكرة لا هائمنا بعده

اليوم ييجري .. وافي بوعدده

مالينا فرحة بضحكتين

وده من سنين

صوتي الحزين بينادي ذكرى

عدت عليها كثير سنين

أنا وسناء .. وكمان نرمين
ونغال وسارة الصغتنين
واكلين سوا شاربين نايمين
ليل امتحان فيه سهرانين
مذاكرة وحماسة وآخر خبائة
بنقرا كلمة .. قصاها نسرح
نعمل معادلة .. نغلط ونفرح
ننسى المذاكرة وحكاويننا تسرح
أهالينا تيجي نتخض خضة
متعصبين .. وورانا تصرخ
ما هو أصلنا بنبقى سوى مهيصين
وم المذاكرة بأي حجة هربانين

لكن صحيح .. كنا شاطرين
ده لما كنا زمان .. زمان صغيرين
في قلب بيت حياتنا .. ثمرة سبعة وعشرين
ياااه ع الزمن لما بيعدي بينا
ويكون سفينة ترفع قلوها
و تجري بينا
تجري تبعد عن المدينة
نلاقي روحنا في الحياة
افترقنا ما التقينا
تسرقنا السنين من بعضينا
ياااه ع الزمن لما يتسرب
من بين إيدينا

وعلانا حزن وحنين

على ذكرياتنا من زمان

من سنين

فاكرة زمان نفس المكان لما كنا ملمومين

عندي أو مع سناء أو في بيت نرمين

في البلکونة سهرانين

حوالين لعبة فرحانين

متجمعين .. الصبح بيصَّح علينا

و احنا ولا دارين

وده من سنين في قلب عمارة

سبعة وعشرين

واسكندرية صافية ومرية

مصيفنا فيها أجمل هدية

ع الرمل نجري في البحر نلعب

آخر النهار نتهد نتعب

نفضل نقاوح عشان هنركب

عجل ونعمل سباق وفرب

نغلب تعبنا بضحكة تطرب

ده لما كنا صغيرين

من زمان .. من سنين

صوتي الحزين ينادي ذكرى

عدت عليها كثير سنين

جنتنا كانت جوا العمارة
م الدور الأرضي لحد الآخر
الكل عارفنا زي التاريخ
لما يعلم ع الحجارة
أصلنا كنا الحجارة
كنا جدران العمارة
كانت نقوشنا محفورة زينة ع المحارة
كنا شريان الحياة في قلبها
أبوة حفظتنا العمارة

تصَبَّح علينا الصبح بدري
وتراعيئا و احنا رايجين المدارس

وتقابلنا مقابلة قمري
واحنأ راجعين لك الفوارس
نحس بيها أمانا
مش عايزة تبعد عننا
متدارية في الحيطان
وف قلوبنا ومننا
تفرح قوي لفرحنا
وترغوط لما ننجح في الدراسة
وتحزن ان بكينا كلنا
والأ حد فينا راحت من قلبه الحماسة

بتلاقيها ضمانا بكل خوف
بتلاقيها في الكلام هي الحروف
بتلاقيها منورة بين العماير والصفوف

تراب إيدينا هو بصمة العمارة
ضحكنا و فرحنا
حتى الحزن لما كان يبجي جنبنا
هتلاقوه في العمارة

ذكرياتنا عمر فات وانقضى
نجمه عديناها في القضا
جددوها .. غيروها

لبسوها ثوب حديد
مستحيل هيمسحوها
زي هي ف كل عيد
جوه قلوبنا ليها مكانها
مهما العمر بينا يزيد
ناخد منها عمرها
ونقول لها هل من مزيد
من قلبها تدينا تاني
نفضل ساكنين حضنها
بكل الأماي
لأننا كنا الزمان .. كنا المكان
كنا المعاني

كنا العمارة والعنوان

كنا أوتار الأغاني

من زمان

في كل بيت نلاقي راحة

و كل بيت لنا بيت

و كل أم أمنا و كل أب منا

و كل ولد يبقى أخونا

و كل بنت أختنا

فاكرة كمان فرحتنا تكمل

في العيد و نعمل

فريق كبير

في بيننا فارس شهيم وأمير
وبوليس بيجري ويا الغفير
و حرامي دايع على السلام عايز يطير
وفي كل دور نطلع ندور
ننادي بعض ونلّم بعض
نعمل فريق وكلنا نفس الصديق
ماعمرناش في يوم بعدنا
أو في يوم فرقنا ضيق
لكن كان ما بيننا واحد
ساهي وعامل فيها رقيق
حالف ما يجمعنا العمر
وانه لهيدوقنا المر

كان الصديق هو الزمن
وكان الفراق هو الثمن
كانت هي دي خطته
ماهو كان بيجري وسطنا
وويانا يلعب لعبته
خلانا للعمارة مشتاقين
دفن حياتنا في ذكرياتنا
جوه حضن الغرقانين
ليه يا زمن سرقت منا فرحنا
و ليه يا زمن فرقنا بين قلبنا
صبح صوبي الحزين
بينادي ذكرى عدت عليها كثير سنين

وصبحنا دمة أنين تايهة بين جدران

عمارة سبعة وعشرين

« بتسأليني مالي؟! »

بتسأليني مالي؟

ماتسأليني ف حالي

لأ... ماتفكر يش

عن جرحي ماتسأل يش

لأني خلاص عرفت

إزاي من غيرك أعيش

بتجرحيني وتبكي

وتسأليني وتشكي

وتقولي عني كلام

ياريتك كنتي صدّقتي

وبتسأليني مالي..!

هو انتي ماتعرفيش

اني خلاص فهمتك

لكن انتي مافهمتينيش

من غيرك هقدر أعيش

لو كنتي تعرفي تطفلي بإيديكي ناري

وعن روحي تدوري مكنتش خدت قرار

تعرفي.. متعرفيش

تقدري.. ميهمنيش

انتو روحي خلاص في سكه

خليكى فيها مترجعيش

وبتسأليني مالي

هو انتي مابتحسيش

خلاص..قدرت أعيش

« جوانا إيه؟؟ »

جوانا حب ولا كره ولا خوف ولا إيه؟

جوانا فرح ولا جرح ولا شوق باكيين عليه

جوانا ماضى خلانا عادى نتظلم ومانقولش ليه

ولا إيه ولا إيه؟ إحنا جوانا إيه؟

جوانا إيه بعد الجراح واللي راح م العمر

ليه ندور عليه

جوانا هجر والا فجر راح انطفى

في دروبنا ليه

جوانا ألف آه ألف لاه

و ألف جرح ماشين عليه

جوانا ذكرى والا فكرة

والا ضعنا والا إيه

جوانا بداية والا حكاية ملهاش نهاية

والا عمر ضاع مننا بنكي عليه

جوانا آه والا حياة والا موت والا إيه

جوانا ماضي خالنا عادي نتظلم منقولش ليه

والا إيه و الا إيه احنا جوانا إيه

« أنسى »

عائزني أنسى و أكمل المشوار معاك
أنسى الخيانة و الألم شفته في هواك
أعيش غريق .. جوه بحرك يا هلاك
دلوقتي لا .. مقدرش أعيش لحظة معاك

كان حبي ليك أجمل حقيقة في الوجود
كان كل شيء .. كان حياتي لما أموت
دلوقتي لا .. مقدرش أعيش لحظة معاك

جيت مرة ساكت و الخداع باين عليك
بتبص فوق .. يمين شمال .. زايغة عينيك
لأ قول قوام .. متخفش قول .. مين هي دي
شايفة صورتها مرسومة جوه في لون عينيك
كان حي ليك أجمل حقيقة في الوجود
كان كل شيء .. كان حياتي لما اموت
دلوقتي لا .. مقدرش أعيش لحظة معاك

و تاني جيت بعد أما كنت مصدقك
إني الوحيدة اللي ف حياتك اني هواك
راجع تقول سامحيني آسف ع الخيانة
حرام عليك عذبتني و الله معاك

كان حيي ليك أجمل حقيقة في الوجود
كان كل شيء .. كان حياتي لما اموت
دلوقتي لا .. مقدرش أعيش لحظة معاك
يا قلبي كنت انت و انا لعبة في ايديه
دائما يا قلبي انت و انا هابينين عليه
ده طير مهاجر يحب دي و ينسى دي
و اما يدوب و الشوق يا عيني يعذبه
ب يرجع لي ليه ؟؟

لأ روح وغيب مليون حبيب يتمنوا حتى نظرتي
أصلي في هواك دموع عنيا سرقت مني ضحكتي
و اما ابتديت انت انتهيت إبعد خلاص من سككتي

عايزني أنسى واكمل المشوار معاك

انسى الخيانة والالم شفته في هواك

اعيش غريق جوه بحرك يا هلاك

دلوقتي لا .. مقدرش اعيش لحظة معاك

كان حي ليك أجمل حقيقة في الوجود

كان كل شيء .. كان حياتي لما اموت

دلوقتي لا .. مقدرش أعيش لحظة معاك

« مصر يا أمه »

* إهداء للشاعر الكبير "أحمد فؤاد نجم" وأي تشابه بين كلمات قصيدتي و قصيدته المشهورة فهو القياس من قبيل حيي و احترامى لأعماله العظيمة

مصر يا أمه يا بهية

بطرحة كنتي وجلابية

و النهاردة بقيتي هانم

لابسة من شر البليّة

مصر يا أمه يا سفينة

قمتي ليه بين المواني

مصر يا أمه

حوشي توبك

لطحوه حبة غواني
مصر يا أمه مكيجوكي
باعوا شرفك ضيعوكي
العصابة المفترية
ليسوا هما وقلعوكي

مصر يا أمه فوق ترابك
الشباب باعوا القضية
طب ماها معذورين
في القهاوي مرصين
كل واحد فوق دماغه
بدل الهم .. شايلا اثنين

مصر يا أمه جرحوكي

مصر يا أمه عذبوكي

مصر يا أمه خانوا هما و خَوَنوكي

مصر يا أمه يا مكبوسة

دُقنا كثير من طعم الكوسة

و ثمن الكوسة يبقى حلال

عز ومركز واستغلال

كله مستف راس المال

ف "دور أيتام" لندن محروسة !

عادي يا أمي ماحنا خلاص

طلعنا خلاص كلنا م الصورة

ضمير ولادك راح انداس

ومعدش في الراية المنصورة

مصر يا أمه المجديني

إلحقيني وإعرفيني

بالهجر ليه بتعذيني

مصر يا أمه عودي ليا

جوه حضنك استريني

عن أيديهم إبعديني

هيهوكي وهيهوني

وتحت الصفر يرجعوني

مصر يا أمه اغسلي وشك

مصر يا أمه البسي توبك

وصدقني مش بغشك

إلحقني بضيع من إيدك

إلحقني

« إقتليني »

إبعدي عني اخسريني
ضياعي من حياتي روحي
اقتلي الشوق اقتليني
زودي في قلبي جروحي

انسي قلب حبه راح
عاش هواكي بالجرأح
والنهاية جرحك انتي
ضيع حي من سيني

عشتك انتي حب
جوا قلبي راح قوام
والسبب خداعك انتي
كدبك اللي كان لجام
بتضحكي عليا بيه
كملي وعذبيني
ابعدي عني اخسريني
اقتلي الشوق اقتليني

والا أقولك لأ كفاية
معدش فاضل غير سكوت
كان قلبي حاسس م البداية

ما بين ايديكي راح اموت

وانتهت كل الحكاية

كنتي حبي نفي عيني

إبعدي عني اخسريني

ضيعي من حياتي روحي

اقتلي الشوق اقتليني

زودي في قلبي جروحي

« راحت خلاص »

راحت خلاص عليك خلاص راحت عليا
سنين هوانا اللي راحت واللي جاية
كان حلمي ابي اعيش واموت وانا بين ايديك
كان كل همي ابي ارضي قلبك شوق عينيك
كان حبي ليك وهم عايش في خيالي
كان قلبي فاكر انك انت حبيب مثالي
لكن خلاص راحت عليك راحت عليا
سنين هوانا اللي راحت واللي جاية

قالت العيون كلام كثير ساعة اللقا

قالت اللي كان احلام كثير متفرقة

قالت خلاص هانت عليك هانت عليا

ذكرى السنين اللي ضاعت من ايديا

راحت خلاص عليك خلاص راحت عليا

« كلمتين »

نفسك تشوفني ليه

عايز تقول لي إيه

جاي راجع عشائي

طب كنت بعدت ليه

دموعك فات أوانها

وفي قلبي ضاع مكانها

راح اللي راح يا قلبي

ومش هدور عليه

إفضل كده خليك مشتاق

خليك دايب م الأشواق

يوم ترجع لي ويوم تنساني

وعشرة أفضيهم وحدي فراق

نفسك تشوفي ليه

عايز تقول لي إيه

جاي وراجع عشائي

طب كنت بعدت ليه؟

« سامحتيني »

بجك آه .. سامحتيني

بجك يا ضيا عيني

فداكي أنا يا روح قلبي

وبعمري أضحي أكيد

لو لفيت بلاد وبلاد

و ضاع مني الطريق و الزاد

هواك فقلبي والله زاد

وهو طريقي و دليلي

عشقت الدنيا دي عشانك

وقلبي هو عنوانك

مفيش جوايا في مكانك

لا كان ولا هـيكون
بـجـبـك آه .. سـاعـتـيـني
بـجـبـك يا ضـيا عـيـني
فـدا كـي أنا يا رـوح قـلـبي
وبـعـمـري أضـحـي أكـيد
سـاعـتـيـني و أنا الغـلـطـان
دـه قـلـبـك بـحـر كـله حـنـان
بـقـيـت مـعـاك أنا إنـسـان
غـنـي و مـلـكـت الكـون

« الدرس »

بس هس .. هس بس

اسمع منك ليه الدرس

والتزام ويا نظام

كله يبقى في التمام

اسمعوا المحظورات

لا .. كلام لا .. سلام

كله لازم التزام

بص جب زميلك لأ

حتى وانت ويا نفسك

برضه تمنع الكلام

وان لمحتك واقع زق

يبقى عا لله السلام

الفلكة هي تعرفك

تلت الثلاثة يبقى كام

بالمنااسبة يا بهام

حفظتوا جدول ٤٠

يفتكس* بهيم من دول

أقصد عيل م العيال

تلميذ صغير

عمره يا دوب عشر سنين

يقوم يقف وبخوف يقول

أ أ أ بأ بأ بأ أص أص نين نين

* بلغة شباب اليومين دول يعني يعمل نفسه الواد الجحامد.

يزْعَق الأستاذ ينطق الحجر كأنه غول

- ماتنطق يا ااااااض

يصغر العيل يكش يرتجف ويقول قوام

= بصراحة يا مستر

انت لم تدينا الا جدول ضرب ١٠

مش يا مستر ٤٠

وفجأة يُسمع انفجار

تكونش الحرب جت كمان

والا غزونا الامريكان

أتاري الفرقة يا سادة

فرقة الخيزان و اعتراضها ع الكلام

العيال يا عيني كشوا جوا بعض ويا بعض

حتى اللي حافظ أي حاجة نسيها من هول الكلام

و الكل بحلق في الخيرزان

اصله أهبل زي الأهبل اللي شايله في انتقام

و السليم يا عيني دمع جاله م الرعب الزكام

- انت هتفهمني شغلي يا بن السـ " تـيـيـتـ"*

تكون انت و التخته واحد واللي أقول عليه أوامر

أقول تطير تقوللي حاضر

وقرب شوف ع المكشوف وش غريب مش مألوف

وش بيلعب ويا ألوف وش مداري جواه وش

عامل قال استاذ مكسوف

* كلمة قبحة حذفها لأنها مش موجودة في القاموس الانساني ... وواضح ان الراجل ده بيتفرج كثير على وديع.

ينقض على واد غلبان
فاكره فريسة مش انسان
زعق شلت و اضرب جامد
صدق اللي قال عنك حيوان
بس حرام نظلم حيوان
قلبه بيعطف ع الانسان
امال تفتكروا نقول ايه
عن واحد تلميذ شيطان
هو تمام هو تمام
الاستاذ تلميذ شيطان
ايوة تمام ايوة تمام
الاستاذ عامل غلبان

يكون واخذه جوز شباشب ع الصباح

و صوته رايع م الزعيق والصباح

والمدام يومها بادئ

بالمطالب و النواح

يقف قدامها ساكت صابر

ويجي قدام العيال

عامل فيها ديك برابر

متنططة العفاريث في وشه

والعرق مغطي كرشه

مقدرش يبق* في المدام

و ع العيال غله يفشه

* يعني مقدرش يفتح بقة معاه.

دي حاجة فعلا مش تمام
ويكون كده قُصر الكلام
في الأول تيجي التربية
و من بعدها يبقى العلام
ليه يا فاضل الزعيق والا الشتيمة
ليه هَبُط في التلامذة م العزيمة
مرة واحد زي حالاتك م الترفزة
قتل له طفل في حصته وصبحت جريمة
يقي العيال يروحوا عشان يتعلموا
والا رايحين اعتقال يتألموا
دمرت أسرهم بالهبل ويا الغلط
ويوم ما حسبوا ابنهم هيبقى حاجة في البلد

خليتهم ليه يا قاسي ليه من العلام يتندموا

دي حاجة فعلا مش تمام

ويكون كده قُصر الكلام

في الأول تيجي التربية

و من بعدها يبقى العلام

« ميهمنيښ »

ميهمنيښ لو حد جواك آخذ مكاني

ميهمنيښ تضيع معاك كل الأمان

ميهمنيښ أكون لوحدي

أو أعيش أتحدى بعدي عن عينك

ميهمنيښ أكون خيال أو أكون محال

أو ذكرى ماتت بين إيديك

ميهمنيښ أعيش حياتي ف السُكات

ميهمنيښ انت في حياتي ماضي مات

ميهمنيښ انت رحلة فات وقتها

خلصت وبعدت عن حياتي وسيتها

ميهمنيش أصلك بواقى حب راح
والباقي منك يادوب وهم للجراح
ميهمنيش أصلك حبيبي كنت الأناني
وميهمنيش لو حد جواك أخذ مكاني

« أزمة حياة »

حياتنا ماشية بالعكس والا احنا ماشيين مخالف
نورها لونه متعكر وصبحها مخنوق وخايف
يا صُبحنا مين كفّك بخيوط العنكبوت
مين حكم عليك قبل الولادة تقتل وتموت
مين ضيعك مين ودعك مين اللي حاول يخذعك
مين اللي دنس جنتك مين اللي نجس خطوتك
مين عرى منك عورتك .. ضيع براءة نظرتك
وحرق لك أوراق التوت..
أزمة حياة عايشينها آه .. وياما دقنا م الأزمات
مش دي القضية .. مالى عايش عايش باللى يتوّته

واللي مات ماتت من قبله دينته ..
واللي بيشاور في عقله يخلص يوم من أزمته ..
وعلى كل لون فيكي البشر متنتورين ..
يا دنيا فكي الحصار ..
فكي أسر الغلبانين ..
ورجعي للصبح لونه بعد عتمة السنين
وسع يا ابني شوف المنظر ..
لما كان الصبح وزور لونه أخضر ..
لما نسمة النهار كانت بتملق قلب الكون ويعمر ..
وسع يا ابني قول للمكنجي يرجعلنا الصورة القديمة
لما كانت لقمة واحدة بفول مدمس تشبع البطن اليتيمة
ولما كان الفجر ينده للصلاة ..

والكل يجري يلحق صفه القداماني

ولما كان الكل واحد مش *منفسن أو أناني ..

رجع المشهد وشوف الدنيا عالية مستورة وغالية

وشوف شبابنا واللي نابنا واللي اتفطموا ع الحقيقة

لما عرفوا الدنيا فانية وأدوا ليه الضحكة البريئة

اتغيرت ملامح المشهد وضلّم ..

تعب المكنجي اتشجعت إيده وبلّم

لما دنسنا الحياة بسواد قلوبنا ..

بعدت ومشيت البراءة عن دروبنا ..

خطط الزمن همومه فوق وشوشنا ..

بعتر شخبطة ولخبطة فوق ملامحنا .. وعلمّ ...

*منفسن بلغة شباب اليومين دول يعني حقود ومفلول.

« اللي فلت عياره!! »

بتربي في المتربي

و تطبطب ع اللي فلت عياره

وانفلت من بين دياره

تكسب الوكسة

ونكسة تو كس المختوق ف داره

تتلهي في فمار بهدمه مهريده

تحلم في يوم بالبغدده

تقلع هدموم العربده

وتجوز نوسة ومسعده

تنسى حالك واللي جالك

م القضايا المتشاللك
والرغيف يصبح قضية
تنسى بيها ما جراك
يدوس عليك قطر الحياة
مايسيش فيك ولا نص آه
تديك طريق وفي منتهاه
تلقى النهاية هي البداية
طاحناك رحاية يا ولداه
يا ابن آدم ياللي الخطايا مبهدلاك
رمم قلو عك
امسح دموعك
احمد لربك ع اللي معاك

توبه نصوحة تطهرك

وتنشلك من الهلاك

باصص وراك

ومش شايف

قصادك بير غويط

تنفلت رجلك

تقع

تلزق في حيط

تصرخ

يعللى صوتك

ومين يا ولدي يسمعك

ما انت اللي مشيت في سكة غامقة

ما فيها حد يرجعك
ياللي مش واخدلي باله
وماشي يعمل مابداله
وناسي ان العين عليه
صاحبة مبلقة وواعياله
فوق يا ولدي سكتك ممكن تديق.. وبدل ماتكون غطاس في
الحياة.. تصبح غريق

« انكسار »

عدى علينا قمار بليل ملوش آخر
يا غربة المشوار الحزن ليه وافر
يزيح ستار الشمس ويقول له يتأخر
يطعن قلوب الأمس تدمي ألم زآخر
يا غربة المشوار الحزن ليه وافر

ليه الطوارئ فيكي حكم بالإعدام
ليه البراءة تموت وغابوا ليه الحُكّام
ليه تروي أرضك بدمي وفهاري يبقى ظلام
ليه تحزني لي أمي وتطعني الأحلام

يتسحل فيكي البريء وملوش لازمة وثمان
ينقتل فيكي الصديق وترمي غلظك ع الزمن
بتحاكمي ليه اللي مات غريق وجوه نيلك اندفن!

بصي فوق ع اللي حاصل واللي صاير
جوه منك زعزعة وأزمة ضمائر
احنا منك وانتي منا وغيبتي عنّا
والغريب تكويني ليه حضن جنة
بفقد الأمل فيكي وبضيع
راح شتايا ويا صيفي والربيع
والخريف ماشي فيكي بدمعته
اتمسختي بقيتي ليه شكلك فظيع

المفروض نعيش في جنة كتبني علينا نعيش في نار
لون سماكي وطعم جوك مخلوطين ظلم ومرار
كنت فاكرة إنك انتي أحلى حضن و أدفى دار
كنت فاكرة إني حرة لقيتني فيكي في ميت حصار
زمن النخاسة فيكي عاد والبركة في الشطار!
فاكرة نفسك وطن...!! دي حقيقتك انكسار..

« كومبارس »

مش هكون كومبارس فيكي

ماريونيت أسير لديكي

مش هكون صمت وسكون

مش هضيع عشان شاريكي

مش هاكون زى العوام

أملى صدري بالكلام

وحلمى يبقى كيلو لحمة

أو حتى بس جوزين حمام

هطير وهعلى في الفضاء

أفرد بدوري ع المدى

أزرع معاكي من جديد
معنى السماحة والرضا
كلامي هيهز الجبال
مش كلمة تحت الاحتلال
هعدي بحر الصعب فيكي
والغرق ده شيء محال
كومبارس صامت مش هكون
واهرب وأداري في العيون
دموع بكايا من الزمن
هنسى في عذابك من أكون
طاطيت وياما أنا انتهيت
ومن نهايتي أنا ابتديت

أعلى عليكي يا دنيي
وبقوي فوقك مشيت
في ناس خيال ملهاش وجود
وناس تعافرع الحدود
وناس تموت على أرضها
وناس تعاني م الجحود
فيكي هكون فجر الأمل
أكتب رواية بدون ملل
هقلع راكور* الاعتزال
واكتب بداية لدور بطل

*راكور: هو إنطاق المشهد المصور بكل تفاصيله مع المشاهد السابقة له في السيناريو (المكتوب)
واعني به هنا التكرار المتماثل تماما .

٥	الإهداء
٧	« جواب لمصر »
١٣	« امشي يا قلبي »
١٥	« وهم السلام »
١٩	« بحبك قد إيه »
٢٣	« كلام قلم »
٢٩	« لا أنا هبكي »
٣١	« جنون »
٣٧	« جلي انفطر »

٤٣	« عن الحياة »
٤٥	« ع القهوة »
٥٣	« مش حياة »
٥٧	« كواليس »
٥٩	« تفلان علينا »
٦١	« عمارة ٢٧ »
٧٥	« بتسأليني مالي؟! »
٧٩	« جوانا إيه؟؟ »
٨١	« أنسى »
٨٥	« مصر يا أمه »

٩١	« إقتليني »
٩٥	« راحت خلاص »
٩٧	« كلمتين »
٩٩	« ساحتيني »
١٠١	« الدرس »
١٠٩	« ميهمنيش »
١١١	« أزمة حياة »
١١٥	« اللي فلت عياره!! »
١١٩	« انكسار »
١٢٣	« كومبارس »